



Щуццие №16 (49)



Ветхосьяң тада ис, хоты Геннадий Павлович Кельчин «Дух Авт» газетайн рупитты питас. Си кут дув ар потар, лунтар па монсь ханшас. Александр Сергеевич Пушкин лунтар сиран ханшам мосьдан ханты яса толмасяс. Итад «Сорни худые», киметал «Солтан хон». Петр Павлович лунтар

сиран ханшам монсь «Мукарэң доовие» иси ин рахалд ханты мир ясаңан лундаттыя. «Дух Авт» газетайн муң поньлысув Владимир Владимирович Маяковский ханшам стих «Муй сит симась ям па муй сит симась атом?». Павел Петрович Бажов ханшам монсьдан «Тутпар-якпар эвие», русь ясаң сиран

«Огневушка-поскакушка» па «Селох тупайи» («Серебряное копытце»).

Там потрат-монсят тумпина Геннадий Павлович холна ай потар шу-пиет ханшал, хоты дув энмас па муй ин там хатл унты нумман тайдалды. Сидта муң пирысув каматса потар. Лунталан.

Тохалхоп

Ма Пансина энапсам. Панси Лорвоош курт элты ныкды манман нялхосьяң верста кеман ул. Сита луң порайн ёх пишьян велман улдат. Катрашак, парсин нуша удмал порайн, тунты хотат лонсидыдайт. Муң тунты хотан усув. Сохал хот антом, паварт хот антом. Тунты хотан ёлах па пусаңа, пелда эвалт сай. Пусаң понда, пусаң пут элты шайпут омасла. Пусаң эталд — пелда антом, си кут па шайпут кавармал. Урхот кутапан ратхар. Сыпсы элты шумхат тархарман, дув пусаңан восыладайт, сорлат. Ям. Сус пела ар акмал. Худ доват атэд сесь хира пондайт, талдан ампат лапатты ураңан лэсятдайт. Шумхат па хоята лэтыя верлайт. Тад порайн симась шумах щелам улда, тут нядма катдамтыда, худал дэпта ил. Умась лэтыя. Нэмалты хишэм антом,

восьрэм антом. Шумах элты вой палда. Ветрая шавиты понда. Симась вой кат тал кем ант шакал. Кат тад партал юпина нох уйи, ана поны па лэва. Исимет молхатал падам хорпи. Си тумпина па симась вой шеңк аняң па салдаң. Тарамты араг лэдан ки тадаң хатал самен ант вохла. Ситы си усув, манэм нумты питмем порайн.

Пансина сай, шитам. Велсишак сэвас мотурат «Стрелайт» этты питсат. Си мотурат сый ма уталтаман тайдалдам. Кашң ху хоп мотур дув атэд сый тайл. Мотур сыйл элты ма хоп кусяйл уйтсэм, унашак ювмем юпийн. Ин па аңкем сыйлодаң унты охэм, илампа, туп ёхатты питас.

Имолтына, ин молхатал шитам курты, муй сыйн сыймалса? Си хорпи сый па падат хась лап мандат. Хоп

мотур сый хорпи антом. Ад кумийл волды. Ванттэман тунты хотат элты хоятат ким этты питсат. Ма па аңкем пилан ким питсам. Аңкем ёш каталдэм. Палдам. Амуй сыйң куль нуман, тураман сясял. Сялта нопталты пан йиңк шанша тохдаң па сыйң хоп си ил сёшкас. Сора, сора йиңк сяр элты, йиңк лакки подман, хаңхалыял. Утды керэмас, муң пелаев уты ил. Ма палтамасам па аңкем ернас пон илпия ханемасам. Сидта увдам: «Ома, ома, ёхи мандаман, там мома, мома!». Холдаты питсам. Нумтэм сиран аңкеман ёхи тусайм, сахан лап лаксайм, тохалхоп элты ханятсайм. Юухат, уна ювмем юпийн, симась хоп ар вантсам. Палдмем антом. Хурыты верэм, палты верэм омаеман сах илпийн, таңха, хайса.

Карэңан

Атат, таңха, патламашак иты питсат. Ал, таңха, Унтлор тыдась пора ус. Ма си порайн ай, туп-туп манэм нумты питсэм, нял-вет тад доват по-хии. Нумтэм сиран Пансина улдув. Парсин урхот шимал, ар пелак иса тунты хот. Товина, ёңк туты юпина, муң хот хоятлдув иса луңан велпаслаты пана касдалдат. Лорвоошна усув па, Лорвоошан нэмалты хоят ант хасял. Келдчи ёх тумпина сита холна Мохсар ёх усат па нопталсат. Там кат рут ёх катра тэдан яха улдат. Яха Кева яңхлат, яха худ велдат, яха воой велпасдалат.

Асем ант велпасдал, сэм ант тайл, холта манал. Ёдан омасал. Кат яйм — Василий па Николай нопталдтан, пишьян худ велдтан. «Стрела» мотурат велсишак этсат, худхот тайты хопат усат. Ин моштатэм сиран «астраханкайт». Хораң хопат хорпет, туп моса еша айшакат.

Пансина, удмал хуват, иса пишьян велда, па худ антом. Атат патлама иты питсат, йиңкал кашң хатл потмашак ил. Унтлор тыдась кутап кеман, нопталман, ай кары хойты верал улдыйл. Яйңалам хуван-ванан нопталты манман, ма, таңха, си порайн олсам. Нумлэм туп яйңалам сыхты таха элты каднаңа ёхатсатан, худ пайлдан. Ма



па аңкеман нык яңхты парсайм, унашак пишьян элты каврты худ тутыя. Нык мантсам. Микуд ма есялтэм шаншан омасал, Василий па рэшупкайл няртман талдалды.

Нык ёхатсам, худхот доңда хухсам, потардам:

— *Яйе, омаем каврты худ вохас.*

Микуд ел нюхмас:

— *Сита си кат кары олдал, ситдан уялы. Ма дынан олаңна йиңка волькалдам, каталдалдан ки уты тулдан. Ант ки каталдалдан, лэлды омасты питлдув.*

Ясаң сохнам кум антом, карэңан

нох алэмасды, хопшой пуңда йиңка эслапсалды. Ма хоты муй потар. Нумаслам мохилам лэлды хасьдат. Худламан ант ки каталдам. Ньюкел пуша хасям ай молшаң тайсам, молшаңэм пилан йиңка навармасам. Имолтына, молшаң милэм элты нох си сухтаем сясял. Худхот доңда досьлтасайм Микудан. Йиңк сэрийл, ма машьяйн дойдам. Ёшэман каварты ястам карэм каталдам. Молты сиран и карэм си каталдмем. Куш кепа лэлды ант хасьдув, и худэм каврлдув. Си кут Микуд хопшой сая ил нюрматыйс, кимет карэл катлапсалды, манэм масды. Ма худламан услам, ай кеман холдман, ёхи мантсам. Молшаңэм ал лунийл, соорм таха ант тайл. Худламан аңкема маслам. Аңкеман соорм сохан луматасайм. Еша ул яйңалам ёхи ёхатсатан, луй тая картман, вет ун пишьян тувман. Микуд муй лявтты таха тайл? Камн сир иса няха вералды. Василий карэңан эватсалды па пишьяннан пилан аңкеман нык каварсайңан. Лунийм сохдам, юухат, илампа, соорсайт па япсыя нох лэсятсайт. Ситы си ма «подводник» усам. Хотсат мохилам лэлды хайдалдам?